



Obožavanje Allaha najveća je počast (Meka)

Hatib: dr. Abdullah ibn Avad el-Džuheni

16. ševval 1442. po Hidžri / 28. maj 2021.

Hvala Allahu Jedinom, Kome je sve potčinjeno, Silnom, Oprostitelju, Onome Koji noću zavija dan, a danom zavija noć, kao opomenu za razumom obdarene, Onome Koji je probudio srca Svojih odabranih robova, umanjio njihovu želju za ovim svijetom, uposlio ih stalnim razmišljanjem, sviješću o Allahovom nadzoru i zikru – spominjanju Allaha, uputio ih na ustrajnost u pokornosti Njemu i pripremi za Kuću vječnosti, Onome Koji ih čuva od onoga što izaziva Njegovu srdžbu i vodi ih u Kuću propasti, i Koji ih je učvrstio na tom putu u različitim situacijama i stanjima. Zahvaljujem Mu najpotpunijom, najčišćom zahvalnošću, i svjedočim da nema boga osim Allaha, Dobročinitelja, Plemenitog, Blagog, Milostivog, i svjedočim da je Muhammed, sallallahu alejhi ve sellem, Njegov rob, poslanik, miljenik i prijatelj, koji je upućivao ljude na Pravi put i pozivao u pravu vjeru, neka su na njega Allahova milost, blagoslov i mir, i na sve vjerovjesnike, i na svu njegovu porodicu i sve dobre ljude.

O ljudi, bojte se svoga Gospodara i pokajte Mu se, jer Allah voli one koji se često kaju, i tražite oprost od Njega za svoje grijehе, jer On je najbolji Oprostitelj. Iskreno se pokajte svome Gospodaru, ostavljajući grijehе, osjećajući kajanje zbog njihovog činjenja i donesite čvrstu odluku da ih nećete ponovo činiti, a to je tevbei-nesuh koji vam je naređen: “O vi koji vjerujete, učinite pokajanje Allahu iskreno, da bi Gospodar vaš preko ružnih postupaka vaših prešao i da bi vas u džennetske bašče, kroz koje rijeke teku, uveo” (Et-Tahrim, 8).

O muslimani, hadisi-kudsi koji ću citirati spada u red hadisa koji sadrži uzvišena pravila o znanju i djelovanju, osnovama i ograncima, i za koji islamski učenjaci





smatraju da, na sveobuhvatan i cjelovit način, objašnjava svu veličinu i prostranstvo Allahove dobrote, milosti, blagosti i plemenitosti prema Njegovim stvorenjima, i sve vrste dobrote, dobročinstva, samilosti i blagodarnosti, koje se ne mogu pobrojati. Ovaj hadis zauzima visoku poziciju u vjeri, a neki islamski učenjaci posvetili su mu posebna djela. Znameniti islamski učenjak Ahmed ibn Hanbel, Allah mu se smilovao, rekao je za ovaj hadis: “Stanovnici Šama ne prenose hadis plemenitijeg značenja od ovoga.” Ebu Idris el-Havlani, Allah mu se smilovao, kada bi pričao ovaj hadis, iz poštovanja bi kleknuo.

Muslim bilježi od Ebu Zerra, radijallahu anhu, da je Vjerovjesnik, sallallahu alejhi ve sellem, rekao, prenoseći riječi Uzvišenog Gospodara: “O robovi Moji, Ja sam Sebi zabranio nepravdu, pa sam je zabranio i vama, stoga nemojte jedan drugom nepravdu činiti! O robovi Moji, svi ste zalutali osim onoga koga Ja uputim, zato tražite od Mene uputu, Ja ću vas uputiti! O robovi Moji, svi ste gladni osim onoga koga Ja nahranim, zato od Mene tražite hranu, Ja ću vas nahraniti! O robovi Moji, svi ste vi neodjeveni dok vas Ja ne odjenem, pa tražite od Mene odjeću, Ja ću vas odjenuti! O robovi Moji, vi grijешite noću i danju, a Ja opraštam sve grijehе, zato tražite od Mene oprosta, Ja ću vam oprostiti! O robovi Moji, što god vi radili, niste u stanju Meni štetu nanijeti, niti Mi kakvu korist priskrbiti! O robovi Moji, kada bi svi ljudi i džini, od prvog do posljednjeg, bili toliko pobožni kao što je najbogobojazniji među vama, to nimalo ne bi povećalo Moju vlast! O robovi Moji, kada bi svi ljudi i džini, od prvog do posljednjeg, bili toliko grešni kao što je najgrešniji među vama, to ne bi nimalo umanjilo Moju vlast! O robovi Moji, kada bi se svi ljudi i džini, od prvog do posljednjeg, iskupili na jednom mjestu, i od Mene zatražili sve što žele, a Ja svakome od njih dao ono što od Mene traži, to ne bi umanjilo ono što Ja posjedujem ni onoliko koliko bi igla umočena u more umanjila vodu mora! O robovi Moji, to su samo vaša djela koja vam Ja bilježim, a zatim ću svakome dati ono što je zaslužio, pa ko nađe dobro, neka zahvali Allahu, a ko nađe loše, neka ne kori nikoga drugog osim samoga sebe!”





Ovaj časni hadisi-kudsi osvjetljava nam obzorja života, upućuje na put uspjeha, usađuje nadu u srca izgubljenih i zalutalih, koje je šejtan naveo da zaborave sebe i zahvalnost Allahu na blagodatima kojima ih je obdario, a kojima nema broja ni kraja.

Bojte se Allaha, znajte da je obožavanje Allaha najviši stepen i najčasnija pozicija, koju je Allah odabrao za našeg Vjerovjesnika, alejhis-salatu ves-selam, između ostalih pozicija, a dovoljno joj je časti i uzvišenosti to što ju je Allah, u ovom hadisi-kudsi upotrijebio deset puta obraćajući se ljudima, kao i na mnogim mjestima u Svojoj plemenitoj Knjizi.

Bojte se Allaha, o muslimani, budite svjesni Njegovog nadzora, veličajte Ga onako kako ga treba veličati i Njemu prepustite svoje potrebe. U Njegovim rukama su ključevi svih stvari i kod Njega su riznice nebesa i Zemlje, a oni koji ne vjeruju, Allahu druge smatraju ravnim.

Znajte da nam je Allah Uzvišeni naredio bogougodno djelo, rekavši: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Poslanik, sallallahu alejhi ve sellem, rekao je: "Ko na mene donese jedan salavat, Allah na njega donese deset salavata, obriše mu deset grijeha i podigne njegov stepen za deset deredža."

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

